



Anthon Frederiksen
Inatsisartunut ilaasortaq
Inatsisartut
/MAANI

§ 37 naapertorlugu apeqquut nr 2015-008-imut akissut

Inatsisartut suleriaasianni § 37, imm. 1 naapertorlugu aalisarneq pillugu Naalakkersuisunut apeqquaqarsimavutit. Apeqquutit uannut akisassanngorlugit innersuunneqarsimapput.

Apeqquutit:

1. Aalisakkat pisassiissutigineqartartut piginneqatigiilluni ingerlatsivinnut pisassiissutigineqartartut aalisartunut tamakkiinerusumik pisassiissutigineqatqittalernissaat qanoq ilillugu Naalakkersuisut sulissutigisinnaavaat?
2. Aalisakkanik avammut niuernermet atatillugu tunisassiornermi naleqarnerulersitsineq qanoq ilillugu Naalakkersuisut anguniarpaat?
3. Aalisarnerup uneqattaanngitsumik ataavarnerusumillu ingerlanneqalernissaa anguniarlugu Naalakkersuisut qanoq iliuuseqarniarpat?

Akissut:

1-mut tunngatillugu) Pisassanik qinnuteqartoqaraangat aalisartup nammineq aalajangertarpaa inuttut imaluunniit ingerlatseqatigiiffik sinnerlugu qinnuteqassanerluni. Ingerlatseqatigiiffiliornermi iluaqutissartaqarpoq, tamannalu inuup ataatsip qinnuteqartup nammineq aalajangertarpaa. Tassunga atatillugu Naalakkersuisuni isumaqanngilagut aalisartut qanoq aalisassanersut pillugit malittarisassiuutissagivut. Aalisartut tamanna aalajangigassaraat. Qinnuteqaateqartoqarneranut atatillugu suliaqarnerni Naalakkersuisut nalilersuinerminni oqimaalutartuartaarpaat aningaasatigit suliffissaqartitsinikkullu atugassarititaasut Nunamut pitsaanerpaanissaat tunngavigalugu.

2-mut tunngatillugu) Ullumikkut avataasiarluni aalisarnernit tulaassuisussaataasoqarpoq qaleralinnut 25 procentimik, raajanut 25 procentimik saarullinnullu 50 procentimik. Taakku saniatigit immikkut Maniitsumi suliffissuarmut 100 procentimik tulaassuisussanngortillugit 1.500 tonsinik qaleralittassiissuteqartoqarpoq. Nunami suliffissaqartitsiniarnerup qulakkeermeqarnissaa pillugu tulaassisussaataaneq pilersinneqarpoq. Aalisarnernit allanit aalisarnerit sinnerinit tamanit 100 procentimik tulaassisussaatsisoqarpoq.

Aalisakkanik tunisassianik naleqarnerulersitsineq suliareqqiinikkut pisarpoq, tamatumingalu ingerlatsinermet pilersaarusioreneq suliffeqarfiit isumagisaraat niuerfinnillu sunnigaalluni. Kalaallit aalisakkanik tunisassiaat avammut tunineqartartut annertuumik naleqarnerulersinneqareerput. Assersuutigalugu qaleralik ilormiui taamaallaat pinnagit ullumikkut atorneqartarpoq, niaqua paperuulu Asia-mut tunineqartarput. Tunineqarsinnaasulli taamaallaat aningaasanik isaatitsissutaasinnaapput. Taamaamat aalisakkanik tunisassiatsinnit naleqarnerulersitsineq aamma atuisunit piumaneqarnerinik tunngaveqarput.

Kalaallit Nunaanni naleqarnerulersitsinermik suliaqarneq pikkoriffigereerparput, taa-

03-02-2015
Suliap normua 2015-110426
All. nr. 1846005

Postboks 269
3900 Nuuk
Oqarasuaat (+299) 34 50 00
Fax: (+299) 34 63 55
E-mail: apnn@nanoq.gl
www.naalakkersuisut.gl

maattoq suli pikkorinneruleqqissinnaavugut Naalakkersuisunilu isumaqarpugut naleqarnerulersitsiniarneq inuussutissarsiortut oqaloqatiginerisigut annertusarneqarsinnaasoq. Naalakkersuisunut taamaammat pingaarpoq aalisarnermik inuussutissarsiutillit suleqatigilluinnarlugit kalaallit aalisakkanik tunisassiaannik siumut isigisumik naleqarnerulersitsinissaannik periarfissarsiornissaq. Matumani taaneqarsinnaavoq suliniut pissanganartorujussuaq angallammik uumatitsivittalimmut tunngasoq ineriartortinneqartoq aamma Aalisarnermut, Piniarnermut Nunalerinermullu Naalakkersuisoqarfimmit malinnaaffigineqartoq. Angallatit uumatitsivittallit qassutinit saarullinnik uumasunik milluaariarlutik ungaluni imaluunniit hotel-inik taasagaanni tunisassiorfissuillu ungasinngisaanniittartut ullut 7-it missaanni sivisunermiluunniit sulisut qassiuneri apeqqutaatillugit tunisassiorfissuarmilu qanoq pisariaqartitsineq naapertorlugu uumatitsisarlutik. Taamaaliornikkut sulisut amerlassusaat naapertorlugit saarullit qassit tunisassiariniarnerlugit pilersaarusiortoqarsinnaavoq kiisalu saarulluup pitsaassusaa qaffatsillugu taamaaliornikkullu tunisassiat akigissaartin-nerulerlugit.

Taakku saniatigut aamma nunat avannarliit tunisassiassap atorluarnerunissaa pillugu suleqatigaavut, ilaatigut misilittakkatsinnik paarlaasseqatigiittarluta.

3-mut tunngasoq) Naalakkersuisunut pingaarpoq aalisarnerup ingerlaavartumik pinissaa kiisalu aalisartut aalisarnertik ukiumut tamarmut agguataarnissaa. Taamaammat aalisarneq pisassiissutit iluanni, assersuutigalugu qaammammut pisassiisarnikkut ukiumullu tamarmut pisassanik qularnaarisuusooq naapertorlugu aalisarnerup malittarisassiuuttarnissaa ingerlatiinnassavarput. Periaatsinik allanik aamma isumaliuteqarsinnaavunga qaammammut pisassiisarnermut atatillugit atorneqarsinnaasunik.

Aammattaaq isumaliutigineqassaaq kitaani sumiiffinni assigiinngitsuni assigiinngitsunik pisariaqartitsisoqarsinnaammat, assersuutigalugu sikukkut aalisarneq eqqarsaatigalugu. Naalakkersuisut Naalakkersuisooqatigiinnissamik isumaqatigiissutaanni eqqaaneqareersutut sikukkut aalisarnermi immikkut pisassiisoqartalernissaa sulissutigalugu aallartippaat. Tassani sulinermi pingaarpoq aalisartut oqaloqatiginissaat. Suliniut pillugu ilaatigut qanittumi avannaanut angalaninnut atatillugu eqqartorneqartarpoq.

Inussiarnersumik Inuulluaqqusillunga

Karl Kristian Kruse

Aalisarnermut, Piniarnermut Nunalerinermullu Naalakkersuisoq